

221.2
909

大方廣圓覺修多羅了義經

唐罽賓沙門佛陀多羅譯

大方廣圓覺修多羅了義經


上海佛學書局印行





大方廣圓覺修多羅了義經卷上

唐闍賓沙門佛陀多羅



如是我聞。一時婆伽婆。入於神通大光明藏。三昧正受。一切如
持。是諸衆生清淨覺地。身心寂滅。平等本際。圓滿十方。不二隨順。於不二
境。現諸淨土。與大菩薩摩訶薩十萬人俱。其名曰。文殊師利菩薩。普賢菩
薩。普眼菩薩。金剛藏菩薩。彌勒菩薩。清淨慧菩薩。威德自在菩薩。辯音菩
薩。淨諸業障菩薩。普覺菩薩。圓覺菩薩。賢善首菩薩等。而爲上首。與諸眷
屬皆入三昧。同住如來平等法會。於是文殊師利菩薩在大衆中。卽從座
起。頂禮佛足。右繞三匝。長跪叉手。而白佛言。大悲世尊。願爲此會諸來法
衆。說於如來本起清淨因地法行。及說菩薩於大乘中發清淨心。遠離諸
病。能使未來末世衆生求大乘者。不墮邪見。作是語已。五體投地。如是三

請終而復始。爾時世尊告文殊師利菩薩言。善哉善哉。善男子。汝等乃能爲諸菩薩諮詢如來因地法行。及爲末世一切衆生求大乘者得正住持。不墮邪見。汝今諦聽。當爲汝說。時文殊師利菩薩奉教歡喜。及諸大衆默然而聽。善男子。無上法王有大陀羅尼門。名爲圓覺。流出一切清淨眞如。菩提涅槃。及波羅密。教授菩薩。一切如來本起因地。皆依圓照清淨覺相。永斷無明。方成佛道。云何無明。善男子。一切衆生從無始來。種種顛倒。猶如迷人。四方易處。妄認四大爲自身相。六塵緣影爲自心相。譬彼病目。見空中華。及第二月。善男子。空實無華。病者妄執。由妄執故。非唯惑此虛空自性。亦復迷彼實華生處。由此妄有輪轉生死。故名無明。善男子。此無明者。非實有體。如夢中人。夢時非無。及至於醒了。無所得。如衆空華滅於虛空。不可說言有定滅處。何以故。無生處故。一切衆生於無生中。妄見生滅。

是故說名輪轉生死。善男子。如來因地修圓覺者。知是空華。卽無輪轉。亦無身心受彼生死。非作故無。本性無故。彼知覺者。猶如虛空。知虛空者。卽空華相。亦不可說無知覺性。有無俱遣。是則名爲淨覺隨順。何以故。虛空性故。常不動故。如來藏中無起滅故。無知見故。如法界性。究竟圓滿。徧十方故。是則名爲因地法行。菩薩因此於大乘中。發清淨心。末世衆生。依此修行。不墮邪見。爾時世尊欲重宣此義。而說偈言。

文殊汝當知	一切諸如來	從於本因地	皆以智慧覺
了達於無明	知彼如空華	卽能免流轉	又如夢中人
醒時不可得	覺者如虛空	平等不動轉	覺徧十方界
卽得成佛道	衆幻滅無處	成道亦無得	本性圓滿故
菩薩於此中	能發菩提心	末世諸衆生	修此免邪見

於是普賢菩薩在大衆中。卽從座起。頂禮佛足。右繞三匝。長跪叉手而白。佛言。大悲世尊。願爲此會諸菩薩衆。及爲末世一切衆生。修大乘者。聞此圓覺清淨境界。云何修行。世尊。若彼衆生。知如幻者。身心亦幻。云何以幻還修於幻。若諸幻性一切盡滅。則無有心。誰爲修行。云何復說修行如幻。若諸衆生。本不修行。於生死中。常居幻化。曾不了知。如幻境界。令妄想心。云何解脫。願爲末世一切衆生。作何方便。漸次修習。令諸衆生。永離諸幻。作是語已。五體投地。如是三請。終而復始。爾時世尊。告普賢菩薩言。善哉。善哉。善男子。汝等乃能爲諸菩薩。及末世衆生。修習菩薩如幻三昧。方便漸次。令諸衆生。得離諸幻。汝今諦聽。當爲汝說。時普賢菩薩。奉教歡喜。及諸大衆。默然而聽。善男子。一切衆生。種種幻化。皆生如來圓覺妙心。猶如空華。從空而有。幻華雖滅。空性不壞。衆生幻心。還依幻滅。諸幻盡滅。覺心

不動。依幻說覺。亦名爲幻。若說有覺。猶未離幻。說無覺者。亦復如是。是故幻滅。名爲不動。善男子。一切菩薩。及末世衆生。應當遠離一切幻化虛妄境界。由堅執持遠離心故。心如幻者。亦復遠離。遠離爲幻。亦復遠離。離遠離。幻亦復遠離。得無所離。卽除諸幻。譬如鑽火。兩木相因。火出木盡。灰飛烟滅。以幻修幻。亦復如是。諸幻雖盡。不入斷滅。善男子。知幻卽離。不作方便。離幻卽覺。亦無漸次。一切菩薩。及末世衆生。依此修行。如是乃能永離諸幻。爾時世尊欲重宣此義。而說偈言。

普賢汝當知	一切諸衆生	無始幻無明	皆從諸如來
圓覺心建立	猶如虛空華	依空而有相	空華若復滅
虛空本不動	幻從諸覺生	幻滅覺圓滿	覺心不動故
若彼諸菩薩	及末世衆生	常應遠離幻	諸幻悉皆離

如木中生火 木盡火還滅 覺則無漸次 方便亦如是

於是普眼菩薩在大衆中。卽從座起。頂禮佛足。右繞三匝。長跪叉手。而白佛言。大悲世尊。願爲此會諸菩薩衆。及爲末世一切衆生。演說菩薩修行漸次。云何思惟。云何住持。衆生未悟。作何方便。普令開悟。世尊。若彼衆生。無正方便。及正思惟。聞佛如來說此三昧。心生迷悶。卽於圓覺。不能悟入。願興慈悲。爲我等輩。及末世衆生。假說方便。作是語已。五體投地。如是三請。終而復始。爾時世尊告普眼菩薩言。善哉。善哉。善男子。汝等乃能爲諸菩薩。及末世衆生。問於如來。修行漸次。思惟住持。乃至假說種種方便。汝今諦聽。當爲汝說。時普眼菩薩奉教歡喜。及諸大衆。默然而聽。善男子。彼新學菩薩。及末世衆生。欲求如來淨圓覺心。應當正念。遠離諸幻。先依如來奢摩他行。堅持禁戒。安處徒衆。宴坐靜室。恆作是念。我今此身。四大和

合所謂髮毛爪齒皮肉筋骨髓腦垢色。皆歸於地。唾涕膿血津液涎沫痰淚精氣。大小便利。皆歸於水。暖氣歸火。動轉歸風。四大各離。今者妄身。當在何處。卽知此身。畢竟無體。和合爲相。實同幻化。四緣假合。妄有六根。六根四大。中外合成。妄有緣氣。於中積聚。似有緣相。假名爲心。善男子。此虛妄心。若無六塵。則不能有。四大分解。無塵可得。於中緣塵。各歸散滅。畢竟無有緣心。可見。善男子。彼之衆生。幻身滅故。幻心亦滅。幻心滅故。幻塵亦滅。幻塵滅故。幻滅亦滅。幻滅滅故。非幻不滅。譬如磨鏡。垢盡明現。善男子。當知身心。皆爲幻垢。垢相永滅。十方清淨。善男子。譬如清淨摩尼寶珠。映於五色。隨方各現。諸愚癡者。見彼摩尼。實有五色。善男子。圓覺淨性。現於身心。隨類各應。彼愚癡者。說淨圓覺。實有如是身心自相。亦復如是。由此不能遠於幻化。是故我說身心幻垢。對離幻垢。說名菩薩。垢盡對除。卽無

對垢及說名者。善男子。此菩薩及末世衆生。證得諸幻滅影像故。爾時便得無方清淨。無邊虛空。覺所顯發。覺圓明故。顯心清淨。心清淨故。見塵清淨。見清淨故。眼根清淨。眼識清淨。眼識清淨故。聞塵清淨。聞清淨故。耳根清淨。耳識清淨。耳識清淨故。覺塵清淨。如是乃至鼻舌身意。亦復如是。善男子。根清淨故。色塵清淨。色清淨故。聲塵清淨。香味觸法。亦復如是。善男子。六塵清淨故。地大清淨。地清淨故。水大清淨。火大風大。亦復如是。善男子。四大清淨故。十二處。十八界。二十五有清淨。彼清淨故。十力。四無所畏。四無礙智。佛十八不共法。三十七助道品清淨。如是乃至八萬四千陀羅尼門。一切清淨。善男子。一切實相性清淨故。一身清淨。一身清淨故。多身清淨。多身清淨故。如是乃至十方衆生圓覺清淨。善男子。一世界清淨故。多世界清淨。多世界清淨故。如是乃至盡於虛空。圓裹三

世一切平等清淨不動。善男子。虛空如是平等不動。當知覺性平等不動。四大不動。故當知覺性平等不動。如是乃至八萬四千陀羅尼門平等不動。當知覺性平等不動。善男子。覺性徧滿清淨不動。圓無際。故當知六根徧滿法界。根徧滿。故當知六塵徧滿法界。塵徧滿。故當知四大徧滿法界。如是乃至陀羅尼門。徧滿法界。善男子。由彼妙覺性徧滿。故根性塵性無壞無雜。根塵無壞。故如是乃至陀羅尼門。無壞無雜。如百千燈。光照一室。其光徧滿。無壞無雜。善男子。覺成就。故當知菩薩不與法縛。不求法脫。不厭生死。不愛涅槃。不敬持戒。不憎毀禁。不重久習。不輕初學。何以故。一切覺故。譬如眼光。曉了前境。其光圓滿。得無憎愛。何以故。光體無二。無憎愛故。善男子。此菩薩及末世衆生。修習此心得成就者。於此無修。亦無成就。圓覺普照。寂滅無二。於中百千萬億阿僧祇。不可說恆河沙諸佛世界。猶

如空華。亂起亂滅。不卽不離。無縛無脫。始知衆生本來成佛。生死涅槃。猶如昨夢。善男子。如昨夢故。當知生死及與涅槃。無起無滅。無來無去。其所證者。無得無失。無取無捨。其能證者。無作無止。無任無滅。於此證中。無能無所。畢竟無證。亦無證者。一切法性。平等不壞。善男子。彼諸菩薩。如是修行。如是漸次。如是思惟。如是住持。如是方便。如是開悟。求如是法。亦不迷悶。爾時世尊。欲重宣此義。而說偈言。

普眼汝當知	一切諸衆生	身心皆如幻	身相屬四大
心性歸六塵	四大體各離	誰爲和合者	如是漸修行
一切悉清淨	不動徧法界	無作止任滅	亦無能證者
一切佛世界	猶如虛空華	三世悉平等	畢竟無來去
初發心菩薩	及末世衆生	欲求入佛道	應如是修習

於是金剛藏菩薩在大衆中。卽從座起。頂禮佛足。右繞三匝。長跪叉手。而白佛言。大悲世尊。善爲一切諸菩薩衆。宣揚如來圓覺清淨大陀羅尼。因地法行。漸次方便。與諸衆生。開發蒙昧。在會法衆。承佛慈誨。幻翳朗然。慧目清淨。世尊。若諸衆生。本來成佛。何故復有一切無明。若諸無明衆生。本有何因緣故。如來復說本來成佛。十方異生。本成佛道。後起無明。一切如來。何時復生一切煩惱。惟願不捨無遮大慈。爲諸菩薩。開祕密藏。及爲末世一切衆生。得聞如是修多羅教。了義法門。永斷疑悔。作是語已。五體投地。如是三請。終而復始。爾時世尊。告金剛藏菩薩言。善哉善哉。善男子。汝等乃能爲諸菩薩。及末世衆生。問於如來。甚深祕密究竟方便。是諸菩薩最上教誨。了義大乘。能使十方修學菩薩。及諸末世一切衆生。得決定信。永斷疑悔。汝今諦聽。當爲汝說。時金剛藏菩薩奉教歡喜。及諸大衆默然。

而聽善男子。一切世界。始終生滅。前後有無。聚散起止。念念相續。循環往復。種種取舍。皆是輪迴。未出輪迴。而辯圓覺。彼圓覺性。卽同流轉。若免輪迴。無有是處。譬如動目。能搖湛水。又如定眼。由迴轉火。雲駛月運。舟行岸移。亦復如是。善男子。諸旋未息。彼物先住。尙不可得。何況輪轉生死垢心。曾未清淨。觀佛圓覺。而不旋復。是故汝等。便生三惑。善男子。譬如幻翳。妄見空華。幻翳若除。不可說言此翳已滅。何時更起一切諸翳。何以故。翳華二法。非相待故。亦如空華滅於空時。不可說言虛空何時更起空華。何以故。空本無華。非起滅故。生死涅槃。同於起滅。妙覺圓照。離於華翳。善男子。當知虛空非是暫有。亦非暫無。况復如來圓覺隨順。而爲虛空平等本性。善男子。如銷金鑛。金非銷有。旣已成金。不重爲鑛。經無窮時。金性不壞。不應說言本非成就。如來圓覺。亦復如是。善男子。一切如來妙圓覺心。本無

菩提及與涅槃。亦無成佛及不成佛。無妄輪迴及非輪迴。善男子。但諸聲聞所圓境界。身心語言皆悉斷滅。終不能至彼之親證。所現涅槃。何況能以有思惟心。測度如來圓覺境界。如取螢火燒須彌山。終不能著。以輪迴心生輪迴見。入於如來大寂滅海。終不能至。是故我說一切菩薩及末世衆生。先斷無始輪迴根本。善男子。有作思惟。從有心起。皆是六塵妄想緣氣。非實心體。已如空華。用此思惟辯於佛境。猶如空華復結空果。展轉妄想。無有是處。善男子。虛妄浮心。多諸巧見。不能成就圓覺方便。如是分別。非爲正問。爾時世尊欲重宣此義。而說偈言。

金剛藏當知	如來寂滅性	未曾有終始	若以輪迴心
思惟卽旋復	但至輪迴際	不能入佛海	譬如銷金鑛
金非銷故有	雖復本來金	終以銷成就	一成真金體

不復重爲鑿 生死與涅槃 凡夫及諸佛 同爲空華相

思惟猶幻化 何況詰虛妄 若能了此心 然後求圓覺

於是彌勒菩薩在大衆中。卽從座起。頂禮佛足。右繞三匝。長跪叉手而白。佛言。大悲世尊。廣爲菩薩開祕密藏。令諸大衆深悟輪迴。分別邪正。能施末世一切衆生。無畏道眼。於大涅槃。生決定信。無復重隨輪轉境界。起循環見。世尊。若諸菩薩及末世衆生。欲遊如來大寂滅海。云何當斷輪迴根本。於諸輪迴有幾種性。修佛菩提幾等差別。迴入塵勞。當設幾種教化方便。度諸衆生。惟願不捨救世大悲。令諸修行一切菩薩。及末世衆生。慧目肅清。照曜心鏡。圓悟如來無上知見。作是語已。五體投地。如是三請。終而復始。爾時世尊告彌勒菩薩言。善哉善哉。善男子。汝等乃能爲諸菩薩及末世衆生。請問如來深奧祕密微妙之義。令諸菩薩潔清慧目。及令一切

末世衆生。永斷輪迴。心悟實相。具無生忍。汝今諦聽。當爲汝說。時彌勒菩薩奉教歡喜。及諸大衆默然而聽。善男子。一切衆生。從無始際。由有種種恩愛貪欲。故有輪迴。若諸世界一切種性。卵生胎生濕生化生。皆因淫欲而正性命。當知輪迴。愛爲根本。由有諸欲。助發愛性。是故能令生死相續。欲因愛生。命因欲有。衆生愛命。還依欲本。愛欲爲因。愛命爲果。由於欲境。起諸違順。境背愛心。而生憎嫉。造種種業。是故復生地獄餓鬼。知欲可厭。愛厭業道。捨惡樂善。復現天人。又知諸愛可厭惡。故棄愛樂捨。還滋愛本。便現有爲。增上善果。皆輪迴故。不成聖道。是故衆生欲脫生死。免諸輪迴。先斷貪欲。及除愛渴。善男子。菩薩變化示現世間。非愛爲本。但以慈悲。令彼捨愛。假諸貪欲。而入生死。若諸末世一切衆生。能捨諸欲。及除憎愛。永斷輪迴。勤求如來圓覺境界。於清淨心。便得開悟。善男子。一切衆生。由本

貪欲發揮無明。顯出五性差別不等。依二種障而現深淺。云何二障。一者理障。礙正知見。二者事障。續諸生死。云何五性。善男子。若此二障未得斷滅。名未成佛。若諸衆生永捨貪欲。先除事障。未斷理障。但能悟入聲聞緣覺。未能顯住菩薩境界。善男子。若諸末世一切衆生。欲泛如來大圓覺海。先當發願。勤斷二障。二障已伏。卽能悟入菩薩境界。若事理障已永斷滅。卽入如來微妙圓覺。滿足菩提。及大涅槃。善男子。一切衆生皆證圓覺。逢善知識。依彼所作因地法行。爾時修習。便有頓漸。若遇如來無上菩提正修行路。根無大小。皆成佛果。若諸衆生雖求善友。遇邪見者。未得正悟。是則名爲外道種性。邪師過謬。非衆生咎。是名衆生五性差別。善男子。菩薩唯以大悲方便。入諸世間。開發未悟。乃至示現種種形相。逆順境界。與其同事。化令成佛。皆依無始清淨願力。若諸末世一切衆生。於大圓覺起增

上心。當發菩薩清淨大願。應作是言。願我今者住佛圓覺。求善知識。莫值外道及與二乘。依願修行。漸斷諸障。障盡願滿。便登解脫清淨法殿。證大圓覺妙莊嚴域。爾時世尊欲重宣此義。而說偈言。

彌勒汝當知 一切諸衆生 不得大解脫 皆由貪欲故
墮落於生死 若能斷憎愛 及與貪瞋癡 不因差別性
皆得成佛道 二障永銷滅 求師得正悟 隨順菩薩願
依止大涅槃 十方諸菩薩 皆以大悲願 示現入生死
現在修行者 及末世衆生 勤斷諸愛見 便歸大圓覺

於是清淨慧菩薩在大衆中。卽從座起。頂禮佛足。右繞三匝。長跪叉手。而白佛言。大悲世尊。爲我等輩。廣說如是不思議事。本所不見。本所不聞。我等今者。蒙佛善誘。身心泰然。得大饒益。願爲諸來一切法衆。重宣法王圓

滿覺性。一切衆生及諸菩薩如來世尊。所證所得。云何差別。令末世衆生聞此聖教。隨順開悟。漸次能入。作是語已。五體投地。如是三請。終而復始。爾時世尊告清淨慧菩薩言。善哉善哉。善男子。汝等乃能爲末世衆生。請問如來。漸次差別。汝今諦聽。當爲汝說。時清淨慧菩薩奉教歡喜。及諸大衆默然而聽。善男子。圓覺自性。非性性有。循諸性起。無取無證。於實相中。實無菩薩及諸衆生。何以故。菩薩衆生皆是幻化。幻化滅故。無取證者。譬如眼根不自見眼。性自平等。無平等者。衆生迷倒。未能除滅一切幻化。於滅未滅妄功用中。便顯差別。若得如來寂滅隨順。實無寂滅及寂滅者。善男子。一切衆生從無始來。由妄想我及愛我者。曾不自知念念生滅。故起憎愛。耽著五欲。若遇善友。教令開悟。淨圓覺性。發明起滅。卽知此生性自勞慮。若復有人勞慮永斷。得法界淨。卽彼淨解爲自障礙。故於圓覺而不

自在。此名凡夫隨順覺性。善男子。一切菩薩見解爲礙。雖斷解礙。猶住見覺。覺礙爲礙。而不自在。此名菩薩未入地者隨順覺性。善男子。有照有覺。俱名障礙。是故菩薩常覺不住。照與照者。同時寂滅。譬如有人自斷其首。首已斷故。無能斷者。則以礙心自滅諸礙。礙已斷滅。無滅礙者。修多羅教。如標月指。若復見月。了知所標畢竟非月。一切如來種種言說開示菩薩。亦復如是。此名菩薩已入地者隨順覺性。善男子。一切障礙。卽究竟覺得。念失念。無非解脫。成法破法。皆名涅槃。智慧愚癡。通爲般若。菩薩外道所成就法。同是菩提。無明真如。無異境界。諸戒定慧及淫怒癡。俱是梵行。衆生國土。同一法性。地獄天宮。皆爲淨土。有性無性。齊成佛道。一切煩惱。畢竟解脫。法界海慧。照了諸相。猶如虛空。此名如來隨順覺性。善男子。但諸菩薩及末世衆生。居一切時。不起妄念。於諸妄心。亦不息滅。住妄想境。不

加了知。於無了知不辯真實。彼諸衆生聞是法門。信解受持不生驚畏。是則名爲隨順覺性。善男子。汝等當知。如是衆生已曾供養百千萬億恆河沙諸佛。及大菩薩。植衆德本。佛說是人名爲成就一切種智。爾時世尊欲重宣此義而說偈言。

清淨慧當知 圓滿菩提性 無取亦無證 無菩薩衆生

覺與未覺時 漸次有差別 衆生爲解礙 菩薩未離覺

入地永寂滅 不住一切相 大覺悉圓滿 名爲徧隨順

末世諸衆生 心不生虛妄 佛說如是人 現世卽菩薩

供養恆沙佛 功德已圓滿 雖有多方便 皆名隨順智

大方廣圓覺修多羅了義經卷上

音釋

髓腦髓息委切 腦奴皓切涎沫涎夕連切 沫莫割切痰徒甘切駛疎士切 疾也

大方廣圓覺修多羅了義經卷下

唐罽賓沙門佛陀多羅譯

於是威德自在菩薩在大衆中。卽從座起。頂禮佛足。右繞三匝。長跪叉手。而白佛言。大悲世尊。廣爲我等分別。如是隨順覺性。令諸菩薩覺心光明。承佛圓音。不因修習而得善利。世尊。譬如大城外有四門。隨方來者。非止一路。一切菩薩莊嚴佛國及成菩提。非一方便。唯願世尊廣爲我等宣說一切方便。漸次并修行人。總有幾種。令此會菩薩及末世衆生求大乘者。速得開悟。遊戲如來大寂滅海。作是語已。五體投地。如是三請。終而復始。爾時世尊告威德自在菩薩言。善哉善哉。善男子。汝等乃能爲諸菩薩及末世衆生。問於如來如是方便。汝今諦聽。當爲汝說。時威德自在菩薩奉教歡喜。及諸大衆默然而聽。善男子。無上妙覺。徧諸十方。出生如來與一

切法同體平等。於諸修行實無有二。方便隨順其數無量。圓攝所歸。循性差別。當有三種。善男子。若諸菩薩悟淨圓覺。以淨覺心。取靜爲行。由澄諸念。覺識煩動。靜慧發生。身心客塵。從此永滅。便能內發寂靜輕安。由寂靜故。十方世界諸如來心。於中顯現。如鏡中像。此方便者。名奢摩他。善男子。若諸菩薩悟淨圓覺。以淨覺心。知覺心性。及與根塵。皆因幻化。卽起諸幻。以除幻者。變化諸幻。而開幻衆。由起幻故。便能內發大悲輕安。一切菩薩。從此起行。漸次增進。彼觀幻者。非同幻故。非同幻觀。皆是幻故。幻相永離。是諸菩薩所圓妙行。如土長苗。此方便者。名三摩鉢提。善男子。若諸菩薩悟淨圓覺。以淨覺心。不取幻化及諸靜相。了知身心皆爲罣礙。無知覺明。不依諸礙。永得超過礙無礙境。受用世界及與身心。相在塵域。如器中錙聲。出于外。煩惱涅槃。不相留礙。便能內發寂滅輕安。妙覺隨順寂滅境界。

自他身心所不能及。衆生壽命皆爲浮想。此方便者。名爲禪那。善男子。此三法門。皆是圓覺親近隨順。十方如來因此成佛。十方菩薩種種方便。一切同異。皆依如是三種事業。若得圓證。卽成圓覺。善男子。假使有人修於聖道。教化成就百千萬億阿羅漢。辟支佛果。不如有人聞此圓覺無礙法門。一刹那頃隨順修習。爾時世尊欲重宣此義。而說偈言。

威德汝當知 無上大覺心 本際無二相 隨順諸方便

其數卽無量 如來總開示 便有三種類 寂靜奢摩他

如鏡照諸像 如幻三摩提 如苗漸增長 禪那唯寂滅

如彼器中鐙 三種妙法門 皆是覺隨順 十方諸如來

及諸大菩薩 因此得成道 三事圓證故 名究竟涅槃

於是辯音菩薩在大衆中。卽從座起。頂禮佛足。右繞三匝。長跪叉手而白。

佛言。大悲世尊。如是法門。甚爲希有。世尊。此諸方便。一切菩薩於圓覺門。有幾修習。願爲大衆及末世衆生。方便開示。令悟實相。作是語已。五體投地。如是三請。終而復始。爾時世尊告辯音菩薩言。善哉善哉。善男子。汝等乃能爲諸大衆及末世衆生。問於如來。如是修習。汝今諦聽。當爲汝說。時辯音菩薩奉教歡喜。及諸大衆默然而聽。善男子。一切如來圓覺清淨。本無修習及修習者。一切菩薩及末世衆生。依於未覺幻力修習。爾時便有二十五種清淨定輪。若諸菩薩唯取極靜。由靜力故。永斷煩惱。究竟成就。不起於座。便入涅槃。此菩薩者。名單修奢摩他。若諸菩薩唯觀如幻。以佛力故。變化世界種種作用。備行菩薩清淨妙行。於陀羅尼不失寂念。及諸靜慧。此菩薩者。名單修三摩鉢提。若諸菩薩唯滅諸幻。不取作用。獨斷煩惱。煩惱斷盡。便證實相。此菩薩者。名單修禪那。若諸菩薩先取至靜。以靜

慧心照諸幻者。便於是中起菩薩行。此菩薩者。名先修奢摩他。後修三摩鉢提。若諸菩薩以靜慧故。證至靜性。便斷煩惱。永出生死。此菩薩者。名先修奢摩他。後修禪那。若諸菩薩以寂靜慧。復現幻力。種種變化。度諸衆生。後斷煩惱。而入寂滅。此菩薩者。名先修奢摩他。中修三摩鉢提。後修禪那。若諸菩薩以至靜力。斷煩惱已。後起菩薩清淨妙行。度諸衆生。此菩薩者。名先修奢摩他。中修禪那。後修三摩鉢提。若諸菩薩以至靜力。心斷煩惱。復度衆生。建立世界。此菩薩者。名先修奢摩他。齊修三摩鉢提。禪那。若諸菩薩以至靜力。資發變化。後斷煩惱。此菩薩者。名齊修奢摩他。三摩鉢提。後修禪那。若諸菩薩以至靜力。用資寂滅。後起作用。變化世界。此菩薩者。名齊修奢摩他。禪那。後修三摩鉢提。若諸菩薩以變化力。種種隨順。而取至靜。此菩薩者。名先修三摩鉢提。後修奢摩他。若諸菩薩以變化力。種種

境界而取寂滅。此菩薩者。名先修三摩鉢提。後修禪那。若諸菩薩。以變化力而作佛事。安住寂靜而斷煩惱。此菩薩者。名先修三摩鉢提。中修奢摩他。後修禪那。若諸菩薩。以變化力。無礙作用。斷煩惱。故安住至靜。此菩薩者。名先修三摩鉢提。中修禪那。後修奢摩他。若諸菩薩。以變化力。方便作用。至靜寂滅。二俱隨順。此菩薩者。名先修三摩鉢提。齊修奢摩他。禪那。若諸菩薩。以變化力。種種起用。資於至靜。後斷煩惱。此菩薩者。名齊修三摩鉢提。奢摩他。後修禪那。若諸菩薩。以變化力。資於寂滅。後住清淨。無作靜慮。此菩薩者。名齊修三摩鉢提。禪那。後修奢摩他。若諸菩薩。以寂滅力。而起至靜。住於清淨。此菩薩者。名先修禪那。後修奢摩他。若諸菩薩。以寂滅力。而起作用。於一切境。寂用隨順。此菩薩者。名先修禪那。後修三摩鉢提。若諸菩薩。以寂滅力。種種自性。安於靜慮。而起變化。此菩薩者。名先修禪

那中修奢摩他。後修三摩鉢提。若諸菩薩以寂滅力。無作自性。起於作用。清淨境界。歸於靜慮。此菩薩者。名先修禪那。中修三摩鉢提。後修奢摩他。若諸菩薩以寂滅力。種種清淨。而住靜慮。起於變化。此菩薩者。名先修禪那。齊修奢摩他三摩鉢提。若諸菩薩以寂滅力。資於至靜。而起變化。此菩薩者。名齊修禪那奢摩他。後修三摩鉢提。若諸菩薩以寂滅力。資於變化。而起至靜清明境界。此菩薩者。名齊修禪那三摩鉢提。後修奢摩他。若諸菩薩以圓覺慧。圓合一切。於諸性相。無離覺性。此菩薩者。名爲圓修三種自性。清淨隨順。善男子。是名菩薩二十五輪。一切菩薩修行如是。若諸菩薩及末世衆生。依此輪者。當持梵行。寂靜思惟。求哀懺悔。經三七日。於二十五輪各安標記。至心求哀。隨手結取。依結開示。便知頓漸。一念疑悔。卽不成就。爾時世尊欲重宣此義。而說偈言。

辯音汝當知 一切諸菩薩 無礙清淨慧 皆依禪定生
所謂奢摩他 三摩提禪那 三法頓漸修 有二十五種
十方諸如來 三世修行者 無不因此法 而得成菩提
唯除頓覺人 并法不隨順 一切諸菩薩 及末世衆生
常當持此輪 隨順勤修習 依佛大悲力 不久證涅槃

於是淨諸業障菩薩在大衆中。卽從座起。頂禮佛足。右繞三匝。長跪叉手。而白佛言。大悲世尊。爲我等輩。廣說如是不思議事。一切如來因地行相。令諸大衆得未曾有。覩見調御。歷恆沙劫。勤苦境界。一切功用。猶如一念。我等菩薩。深自慶慰。世尊。若此覺心。本性清淨。因何染污。使諸衆生迷悶不入。唯願如來。廣爲我等。開悟法性。令此大衆。及末世衆生。作將來眼。作是語已。五體投地。如是三請。終而復始。爾時世尊。告淨諸業障菩薩言。善。

哉善哉。善男子。汝等乃能爲諸大衆及末世衆生。諮問如來如是方便。汝今諦聽。當爲汝說。時淨諸業障菩薩奉教歡喜。及諸大衆默然而聽。善男子。一切衆生從無始來。妄想執有我人衆生。及與壽命。認四顛倒爲實我體。由此便生憎愛二境。於虛妄體重執虛妄。二妄相依。生妄業道。有妄業故。妄見流轉。厭流轉者。妄見涅槃。由此不能入清淨覺。非覺違拒諸能入者。有諸能入。非覺入故。是故動念及與息念。皆歸迷悶。何以故。由有無始本起無明。爲己主宰。一切衆生生無慧目。身心等性。皆是無明。譬如有人不自斷命。是故當知。有愛我者。我與隨順。非隨順者。便生憎怨。爲憎愛心。養無明故。相續求道。皆不成就。善男子。云何我相。謂諸衆生心所證者。善男子。譬如有人。百骸調適。忽忘我身。四肢絃緩。攝養乖方。微加鍼艾。卽知有我。是故證取。方現我體。善男子。其心乃至證於如來。畢竟了知清淨涅

槃皆是我相。善男子。云何人相。謂諸衆生心悟證者。善男子。悟有我者。不復認我。所悟非我。悟亦如是。悟已超過一切證者。悉爲人相。善男子。其心乃至圓悟涅槃。俱是我者。心存少悟。備殫證理。皆名人相。善男子。云何衆生相。謂諸衆生心自證悟所不及者。善男子。譬如有人作如是言。我是衆生。則知彼人說衆生者。非我非彼。云何非我。我是衆生。則非是我。云何非彼。我是衆生。非彼我故。善男子。但諸衆生了證了悟。皆爲我人。而我人相所不及者。存有所了。名衆生相。善男子。云何壽命相。謂諸衆生心照清淨覺所了者。一切業智所不自見。猶如命根。善男子。若心照見一切覺者。皆爲塵垢。覺所覺者。不離塵故。如湯銷冰。無別有冰。知冰銷者。存我覺我。亦復如是。善男子。末世衆生。不了四相。雖經多劫勤苦修道。但名有爲。終不能成一切聖果。是故名爲正法末世。何以故。認一切我爲涅槃故。有證有

悟名成就故。譬如有人認賊爲子。其家財寶終不成就。何以故。有我愛者。亦愛涅槃。伏我愛根爲涅槃相。有憎我者。亦憎生死。不知愛者真生死。故別憎生死名不解脫。云何當知法不解脫。善男子。彼末世衆生習菩提者。以已微證爲自清淨。猶未能盡我相根本。若復有人讚歎彼法。卽生歡喜。便欲濟度。若復誹謗彼所得者。便生瞋恨。則知我相堅固執持。潛伏藏識。遊戲諸根。曾不間斷。善男子。彼修道者不除我相。是故不能入清淨覺。善男子。若知我空。無毀我者。有我說法。我未斷故。衆生壽命亦復如是。善男子。末世衆生說病爲法。是故名爲可憐愍者。雖勤精進。增益諸病。是故不能入清淨覺。善男子。末世衆生不了四相。以如來解及所行處。爲自修行。終不成就。或有衆生未得謂得。未證謂證。見勝進者。心生嫉妬。由彼衆生未斷我愛。是故不能入清淨覺。善男子。末世衆生希望成道。無令求悟。唯

益多聞。增長我見。但當精勤降伏煩惱。起大勇猛。未得令得。未斷令斷。貪
瞋愛慢。諂曲嫉妬。對境不生。彼我恩愛。一切寂滅。佛說是人。漸次成就。求
善知識。不墮邪見。若於所求。別生憎愛。則不能入清淨覺海。爾時世尊欲
重宣此義。而說偈言。

淨業汝當知 一切諸衆生 皆由執我愛 無始妄流轉
未除四種相 不得成菩提 愛憎生於心 諂曲存諸念
是故多迷悶 不能入覺城 若能歸悟刹 先去貪瞋癡
法愛不存心 漸次可成就 我身本不有 憎愛何由生
此人求善友 終不墮邪見 所求別生心 究竟非成就

於是普覺菩薩在大衆中。卽從座起。頂禮佛足。右繞三匝。長跪叉手。而白
佛言。大悲世尊。快說禪病。令諸大衆得未曾有。心意蕩然。獲大安隱。世尊。

末世衆生去佛漸遠。賢聖隱伏。邪法增熾。使諸衆生求何等人。依何等法。行何等行。除去何病。云何發心。令彼羣盲不墮邪見。作是語已。五體投地。如是三請。終而復始。爾時世尊告普覺菩薩言。善哉。善哉。善男子。汝等乃能諮問如來。如是修行。能施末世一切衆生。無畏道眼。令彼衆生得成聖道。汝今諦聽。當爲汝說。時普覺菩薩奉教歡喜。及諸大衆默然而聽。善男子。末世衆生將發大心。求善知識。欲修行者。當求一切正知見人。心不住相。不著聲聞緣覺境界。雖現塵勞。心恆清淨。示有諸過。讚歎梵行。不令衆生入不律儀。求如是人。卽得成就阿耨多羅三藐三菩提。末世衆生見如是人。應當供養。不惜身命。彼善知識四威儀中。常現清淨。乃至示現種種過患。心無憍慢。況復搏財妻子眷屬。若善男子。於彼善友不起惡念。卽能究竟成就正覺。心華發明。照十方刹。善男子。彼善知識所證妙法。應離四

病云何四病。一者作病。若復有人作如是言。我於本心作種種行。欲求圓覺。彼圓覺性非作得故。說名爲病。二者任病。若復有人作如是言。我等今者不斷生死。不求涅槃。涅槃生死無起滅念。任彼一切隨諸法性。欲求圓覺。彼圓覺性非任有故。說名爲病。三者止病。若復有人作如是言。我今自心永息諸念。得一切性寂然平等。欲求圓覺。彼圓覺性非止合故。說名爲病。四者滅病。若復有人作如是言。我今永斷一切煩惱。身心畢竟空無。所有何況根塵虛妄境界。一切永寂。欲求圓覺。彼圓覺性非寂相故。說名爲病。離四病者。則知清淨。作是觀者。名爲正觀。若他觀者。名爲邪觀。善男子。末世衆生欲修行者。應當盡命供養善友。事善知識。彼善知識欲來親近。應斷憍慢。若復遠離。應斷嗔恨。現逆順境。猶如虛空。了知身心畢竟平等。與諸衆生同體無異。如是修行。方入圓覺。善男子。末世衆生不得成道。由

有無始自他憎愛。一切種子。故未解脫。若復有人觀彼怨家。如己父母。心無有二。卽除諸病。於諸法中自他憎愛。亦復如是。善男子。末世衆生欲求圓覺。應當發心。作如是言。盡於虛空一切衆生。我皆令入究竟圓覺。於圓覺中無取覺者。除彼我人一切諸相。如是發心。不墮邪見。爾時世尊欲重宣此義。而說偈言。

普覺汝當知	末世諸衆生	欲求善知識	應當求正見
心遠二乘者	法中除四病	謂作止任滅	親近無憍慢
遠離無嗔恨	見種種境界	心當生希有	還如佛出世
不犯非律儀	戒根永清淨	度一切衆生	究竟入圓覺
無彼我人相	當依正智慧	便得超邪見	證覺般涅槃

於是圓覺菩薩在大衆中。卽從座起。頂禮佛足。右繞三匝。長跪叉手而白。

佛言。大悲世尊。爲我等輩。廣說淨覺種種方便。令末世衆生有大增益。世尊。我等今者已得開悟。若佛滅後。末世衆生未得悟者。云何安居。修此圓覺清淨境界。此圓覺中三種淨觀。以何爲首。惟願大悲。爲諸大衆及末世衆生。施大饒益。作是語已。五體投地。如是三請。終而復始。爾時世尊告圓覺菩薩言。善哉善哉。善男子。汝等乃能問於如來如是方便。以大饒益施諸衆生。汝今諦聽。當爲汝說。時圓覺菩薩奉教歡喜。及諸大衆默然而聽。善男子。一切衆生。若佛住世。若佛滅後。若法末時。有諸衆生具大乘性。信佛祕密大圓覺心。欲修行者。若在伽藍安處。徒衆有緣。事故隨分思察。如我已說。若復無有他事因緣。卽建道場。當立期限。若立長期。百二十日。中期百日。下期八十日。安置淨居。若佛現在。當正思惟。若佛滅後。施設形像。心存目想。生正憶念。還同如來常住之日。懸諸旛華。經三七日。稽首十方。

諸佛名字。求哀懺悔。遇善境界。得心輕安。過三七日。一向攝念。若經夏首。三月安居。當爲清淨菩薩止住。心離聲聞。不假徒衆。至安居日。卽於佛前。作如是言。我比丘比丘尼。優婆塞。優婆夷某甲。踞菩薩乘。修寂滅行。同入清淨實相住持。以大圓覺爲我伽藍。身心安居平等性智。涅槃自性無繫屬故。今我敬請。不依聲聞。當與十方如來。及大菩薩。三月安居。爲修菩薩無上妙覺。大因緣故。不繫徒衆。善男子。此名菩薩示現安居。過三期日。隨往無礙。善男子。若彼末世修行衆生。求菩薩道。入三期者。非彼所聞一切境界。終不可取。善男子。若諸衆生。修奢摩他。先取至靜。不起思念。靜極便覺。如是初靜。從於一身。至一世界。覺亦如是。善男子。若覺徧滿一世界者。一世界中。有一衆生。起一念者。皆悉能知。百千世界。亦復如是。非彼所聞一切境界。終不可取。善男子。若諸衆生。修三摩鉢提。先當憶想十方如來。

十方世界一切菩薩。依種種門。漸次修行。勤苦三昧。廣發大願。自熏成種。非彼所聞一切境界。終不可取。善男子。若諸衆生修於禪那。先取數門。心中了知。生住滅念。分劑頭數。如是周徧四威儀中。分別念數。無不了知。漸次增進。乃至得知百千世界一滴之雨。猶如目覩所受用物。非彼所聞一切境界。終不可取。是名三觀初首方便。若諸衆生徧修三種。勤行精進。卽名如來出現於世。若後末世鈍根衆生。心欲求道。不得成就。由昔業障。當勤懺悔。常起希望。先斷憎愛嫉妬諂曲。求勝上心。三種淨觀。隨學一事。此觀不得。復習彼觀。心不放鬆。漸次求證。爾時世尊欲重宣此義。而說偈言。

圓覺汝當知 一切諸衆生 欲求無上道 先當結三期
懺悔無始業 經於三七日 然後正思惟 非彼所聞境
畢竟不可取 奢摩他至靜 三摩正憶持 禪那明數門

是名三淨觀。若能勤修習。是名佛出世。鈍根未成者。
常當勤心懺。無始一切罪。諸障若消滅。佛境便現前。
於是賢善首菩薩在大衆中。卽從座起。頂禮佛足。右繞三匝。長跪叉手而
白佛言。大悲世尊。廣爲我等及末世衆生。開悟如是不思議事。世尊。此大
乘教。名字何等。云何奉持。衆生修習得何功德。云何使我護持經人。流布
此教。至於何地。作是語已。五體投地。如是三請。終而復始。爾時世尊告賢
善首菩薩言。善哉善哉。善男子。汝等乃能爲諸菩薩及末世衆生。問於如
來。如是經教。功德名字。汝今諦聽。當爲汝說。時賢善首菩薩奉教歡喜。及
諸大衆默然而聽。善男子。是經百千萬億恆河沙諸佛所說。三世如來之
所守護。十方菩薩之所歸依。十二部經清淨眼目。是經名大方廣圓覺陀
羅尼。亦名修多羅了義。亦名祕密王三昧。亦名如來決定境界。亦名如來

藏自性差別。汝當奉持。善男子。是經唯顯如來境界。唯佛如來能盡宣說。若諸菩薩及末世衆生。依此修行。漸次增進。至於佛地。善男子。是經名爲頓教大乘。頓機衆生。從此開悟。亦攝漸修一切羣品。譬如大海。不讓小流。乃至蚊蟲及阿修羅。飲其水者。皆得充滿。善男子。假使有人。純以七寶。積滿三千大千世界。以用布施。不如有人。聞此經名及一句義。善男子。假使有人。教百恆河沙衆生。得阿羅漢果。不如有人。宣說此經。分別半偈。善男子。若復有人。聞此經名。信心不惑。當知是人。非於一佛二佛。種諸福慧。如是乃至盡恆河沙一切佛所。種諸善根。聞此經教。汝善男子。當護末世。是修行者。無令惡魔及諸外道。惱其身心。令生退屈。爾時會中有火首金剛。摧碎金剛。尼藍婆金剛等。八萬金剛。并其眷屬。卽從座起。頂禮佛足。右繞三匝。而白佛言。世尊。若後末世一切衆生。有能持此決定大乘。我當守護。

如護眼目。乃至道場所修行處。我等金剛自領徒衆。晨夕守護。令不退轉。其家乃至永無災障。疫病銷滅。財寶豐足。常不乏少。爾時大梵王。三十八天王。并須彌山王。護國天王等。卽從座起。頂禮佛足。右繞三匝。而白佛言。世尊。我亦守護是持經者。常令安隱。心不退轉。爾時有大力鬼王。名吉槃荼。與十萬鬼王。卽從座起。頂禮佛足。右繞三匝。而白佛言。世尊。我亦守護是持經人。朝夕侍衛。令不退屈。其所居一由旬內。若有鬼神侵其境界。我當使其碎如微塵。佛說此經已。一切菩薩。天龍鬼神。八部眷屬。及諸天王。梵王等。一切大衆。聞佛所說。皆大歡喜。信受奉行。

大方廣圓覺修多羅了義經卷下



大方廣圓覺修多羅了義經

全 一 冊

中華民國二十四年三月初版

◎ 毛邊紙中裝本每冊定價大洋玖分
新聞紙普及本每冊定價大洋陸分
(外埠酌加郵匯費)

出版者 佛學書局 代表 沈彬翰

印刷者 國光印書局

上海新大沽路口

電話三三七四三

總發行所 上海佛學書局

愚園路一五四號

電話三五五二四

分發行所 佛學書局分局

一、上海：麥特赫司脫路中
二、上海：新民路國慶路口
三、上海：幫平街有正書局
四、長沙：玉泉街七十號
五、杭州：西湖龍翔橋
六、北平：東四南大街

分銷處 各埠佛經流通處

